



Mario Jenal (dretg) è il president da la Musica Union Cuira e vicepresident da la Festa chantunala da musica 2013.

L'interess per la festa e plitost magher

Uniun chantunala da musica dal Grischun

DA GION NUTEGN STGIER / ANR

■ **En stgars dus mais ha lieu a Cuira la 27. Festa da musica chantunala. Da las societads da musica grischunas èn stgars 50% da la partida. L'uniun è a la tschertga dad ina persuna che surpiglia il secretariat.** Retschavi las delegadas ed ils delegads sco er ils numerus giasts ha la Musica Union Cuira che ha er gist dà la noda musicala a la radunanza. Sut la direzzion da *Jürg Gysin* ha la furmazion confermà che la qualitat da musica è er en la chapitala grischuna preschenta. Quella uniun da musica cun bunamain 60 commembras e commembbers segna dals 7 fin ils 9 da zercladur 2013 er per l'organisaziun da la Festa da musica chantunala. Beneventada è la raspada betg mo vegnida da *Mario Jenal*, il president da la musica hospitanta, mabain er dad *Urs Marti*, il president da la citad da Cuira. El ha cunzunt engrazià a las musicantas ed als musicants per lur lavur «d'onur» en favur da la musica. Bliers plets da simpatia per las bunamain 3000 musicantas e musicants da noss chantun èn er vegnids dad *Elita Florin-Caluori*, la presidenta dal cussegl grond. La musica saja la lingua dal cor ed a medem mument er la lingua che colleschia. Ella saja adina fascinada da la multifaridad dals pitschens e gronds concerts da las radund 100 societads da musica da noss chantun, ha ditg la dunna da Panaduz. Suenter il cler «gea» dal suveran sviz-

zer per promover la scolaziun da musica en las scolas haja uss il chantun er da sustegnair ferm la realisaziun da quella, ha ditg *Elita Florin-Caluori*. Concludi ses pled ha la presidenta dal cussegl grond cun dir che musica saja l'unica lingua che mintgin sin quest mund chapeschia.


Ferm sustegn da las vischnancas

Sco adina ha *Robert Casanova*, il president da l'Uniun chantunala da musica dal Grischun, manà en moda persuadenta e cun in empernaivel umor la radunanza. Musica unescha, mova e fascinescha, ha el ditg ed ultra da quai tgira ella er ils contacts socials. L'incumbensa da l'uniun che unescha musicantas e musicants da noss chantun saja anc adina da promover e cunzunt da segirar la qualitat da la musica e da las societads, che sajan er ina ferma pitga en las vischnancas. *Robert Casanova* ha lura er engrazià a las 76 vischnancas che han sustegnì l'onn passà las uniuns da musica cun passa 300 000 francs. In vair success saja stada la Festa chantunala da musica da giuvenils a Jenaz cun radund 600 musicantas e musicants da la garda giuvna. La proxima festa da quel gener en dus onns duai avair lieu en Engiadina u en Surselva, ha ditg il pli «aut» musicant da noss chantun.

«Mo» 45 musicas dal Grischun

Daniela Vincenz, la cassiera da l'Uniun chantunala da musica dal Grischun, ha preschentà il quint annual che serra tar

entradas e sortidas da 202 000 francs cun in pitschen deficit da 5000 francs. Sa retratg sco president da la cumissiun da musica è *Roman Caprez* e per el surpiglia da nov quel uffizi *Reto Mayer*. *Roman Caprez* resta dentant commember da quella cumissiun. Demissiunà ha lura er *Ruedi Derungs* sco secretari da l'uniun e tar la radunanza da sonda passada èsi betg stà pussaivel da chattar in successur per el. Fin a la fin da quest onn vul la suprananza da l'Uniun chantunala da musica dal Grischun chattar ina soluziun per occupar quel post. En bunamain dus mais ha lieu a Cuira la 27. Festa chantunala da musica. Da la partida èn 76 furmazions da musica e da quellas derivan «be» 45 dal Grischun. Cun ina participaziun da stgars 50% da las societads da musica da noss chantun saja quella tut auter che cuntentaivla, ha ditg *Robert Casanova*. Donn saja ch'ils dirigents sajan en quella chausa betg ils «motors» per persvader las furmazions da musica da sa participar a la concorrenza, ha manegia il Lumnezian. Ina mancanza da musicants da noss chantun sa mussa dentant er tar la scola da recrut ad Aarau nua che umens fan servetsch per suenter appartegnair ad ina musica da militar, quai ha ditg il chapitani *Werner Horber*. La radunanza da delegadas e delegads 2014 ha lieu a Tavau. Terminà la radunanza ha *Robert Casanova* cun quests plets: «Quai ch'il sulegl è per la natira è la musica per la vita.»



La cassiera da l'uniun, il schef dals veterans ed il president dals veterans: Daniela Vincenz, Jürg Padrutt ed Erich Zanoli (da san.).



Il president da la citad da Cuira Urs Marti (san.) e Roman Caprez, l'antier president da la cumissiun da musica.



Dus antier presidents da la cumissiun da musica: Raimund Alig ed Arnold Spescha (da san.).



Roman Sommer (san.), il manader da project da l'uniun e Werner Horber, chapitani da la musica da militar.



In Sursilvan e dus Engiadinais: Ivan Vinzens, Curdin Brunold e Reto Mayer, il nov president da la cumissiun da musica (da san.).

FOTOS G. N. STGIER



Han represchantà duas musicas da la Val Alva: Anita Barandun, Otto e Karin Brazzerol (da san.).